

DAPLI CHE MO FURMIAS?

da Silvana Derungs



Punts 178, 06-2009, p. 11

Las furmias èn lavurusas. Fertant che jau spetg sin mes bus, ma porschan ellas distracziun. Communablamain transportan trais furmias ina mustga vers lur igniv en las sfessas dal passape. Quant socialas, quant intelligentas, quant comunicativas ch'ellas èn! Schegea, quella «comunicaziun» sa basa main sin ina comunicaziun intelligente che sin il fatg che tuttas trais sa movan e tiran la preda vers l'igniv. Quant grond è il mund da questas furmias? Quant lontan lur orizzont? Sentan ellas era la midada dal clima? Crisas economicas probablamain betg. Tut il pli datti ina catastrofa locala per in pievel, cura ch'il lavurer communal passa speravi cun il tissi.

Entant è il bus arrivà ed jau prend plaz. Sin mia tastga erra ina furmia. Persa! Quant ditg surviva ina furmia senza pievel? La duai jau deliberar da sia tschertga invana e la mazzar? Tge dilemma! Tge pussanza! Simplamain smatgar questa pitschna creatira tranter polesch e det mussader. Simplamain mazzar – u tuttina laschar viver? Bunamain blasfemic da sa sentir sco Dieu che decida. Tge pussanza che nus umans al spitg da l'evoluziun avain! E blera da quella pussanza vegn demonstrada envers noss conumans, era sch'i va gnanca per il survivor, mabain be per avair la pussanza sco tala. Genocids e guerras e torturas e guerras e destrucziun da noss agen abitadi e quel dad auters abitants da quest planet. Vegni a dar insacura in mund senza guerra? Fissi era pussaivel che creatiras intelligentas influenzassan a moda positiva il mund? Ils umans han creà meds per destruir sasezs. È quai forse il svilup normal da l'evoluziun? Sche l'umanità ha gè l'intelligenza da runcar gauds e domesticar e tegnair muaglia, dad extrair petroli or da las pli profundas profunditads, da construir maschinas cun grondiusas emissiuns da dioxid carbonic ed armas atomaras – pertge lura retegnair quest svilup?

Cun noss'intelligenza ed en vista a las crisas actualas (ed a quellas per las generaziuns futuras) fissi necessari da dar in'otra direcziun al svilup ed era da collavurar globalmain. Pertge? Co schliar il problem da la midada dal clima, sche la China n'è betg cumpigliada en questa discussiun (betg che la China suletta fiss la culpa)? Co schliar il problem da las armas nuclearas, sche grondas pussanzas atomaras (sco la Russia) na collavuran betg? Ma ina collavuraziun da tut ils pajais da quest mund para quasi utopica. Funcziunass in parlament democratic mundial? P.ex. cun pajais che na possedan sezs gnanca in parlament funcziunant? Giess quai senza disfidanza, senza smanatschas, senza intimidaziuns e senza dimostraziuns da pussanza? Co duai la China chattar fidanza envers l'USA, sche quella na transferecha betg tut sia tecnologias en China, era pervia da disfidanza? Co reageschan ils pajais dal vest, sch'els ston in di dar giu lur pussanza als pajais da l'ost? Co limitar il sfarlattim d'energia (fossila) da quasi tut las pussanzas? Quant dependents che nus essan da tscherts pajais, ha la Russia demonstrà l'enviern passà cun interromper la furniziun da gas a l'Ucraina.

E tge capitass, sch'in tal parlament mundial funcziunass? Na dessi naginas guerras pli e vegnissan las cundiziuns da viver meglieradas er en pajais dal terz mund? Creschiss la populaziun sin quest mund lura uschè ferm che nus giessan tuttina a la malura? Dovra l'umanità forse mintga 50 onns ina guerra mundiala per evitar ina surpopulaziun? U pudessan nus – sa chapescha noss politichers a la testa dal parlament mundial ed insaquantas persunas en gremis d'experts – strapatschar noss tscharvels per chattar soluziuns per che noss planet possia purtar in pèr milliuns abitants dapli?

Entant è il bus a la staziun e la furmia svanida. Ed jau deliberada da mia decisiun e da mia responsabladad. Ed jau cuntinuesch sco fin qua cun mia vita europeica senza guerras e fominas. E sper che auters cun dapli sabientscha chattian la buna soluziun per tut las crisas mundialas.